

Wosi Phawulosni wosiya Qoroxoski asuni meyak Gachgiru

Phawulos Qoroxoski asuni meyak tichina is-sonsa wosiyaas tichchenaas Qoroxosuk tokna betekiristaniissi kiristinnani kaasiknawa aman-toosikna kabi chowaasi rakkok kotba imak safare-faatwa. Es kabaasik Qrontoos show tesa asuni meya feeseffe Girikni katama sinbaastan denalo Akayiya yiste Roomni ha'suussi arki katama. Es katamaas akama nagadak; sinnoy ge'ni dubbiyok; akamanon tagit fa mangu amalaknawa hayman-otiisikitioni showokna arto.

Wosiis arkiron betekiristaniissi fa oor oor kesaason; zinaason; gerkesni chowaasik; ephne girune asi chowaasik; betekiristanini sitirini chowaasik; Korto ayyanaasi imaasikitonewa kitun kabuni chowaasiknatu makefe. Esiisimato wosiis es mamsusikitok misirachchuni kaamaas wolguba imanamatotu make.

«Keeshtana» Ha'oos daraasik imna imaasikitosin akama sinbaason besifaas eddeba asire keezesta fa bar han matsafaassin arto dima yisteratu faadtefa.

Matsafaas Siruk Ephna Ephobaas

Gachgiru 1:1-9

Kiristanani meeni ganeyaassi kabi oor oor ke-saas 1:10—4:21

Gerkesa 5:1—7:40

Koo'lok shukte ashaason muuni chowak
Phawulos imna wolgu 8:1—11:1

Betekiristanini kaanewa Ha'oni shiiphoni
sitirine 11:2–14:40

Kiristoosnawa amanyinyini meeni kitun
kabune 15:1-58

Yuudak feese rakkata kiristanani meyak zagte
argasu 16:1-4

Teetni chownewa matsafaasi koor'une 16:5-24

¹ Ha'oosi fiqadik Kiristoos Yesusni wosi sinanak
teegte Phawulosnawa ayni sina Sostensikna;

² Qoroxosni katamaassi fa Ha'oosi betekiris-
taniisik; barissi feese Kiristoos Yesusnik korto
sine baassoknawa korto sinonek teegte baas-
sokna; esiisimato dima dimaassi baassoknawa
innokna Daam sina Daamni Yesus Kiristoosni
sunaason teegsefe baasso zuuttambesiise asik;

³ Abani sina Ha'ooskinnawa Daam Yesus
Kiristoosnikinna otumnewa nagane nittok
sinfawungwa.

Galata Ha'oosik

⁴ Kiristoos Yesusniki kamo Ha'oos otumbaason
nittok imna boor'a wonna wonna Ha'onaason
galattefawungwa.

⁵ Zuuttambaase asik wollak sinun aruk Kiri-
stoos Yesusnik otum sinetiwa.

⁶ Kiristoosni chowaasik makeni zaalaas nittokik
zagiratu fawa.

⁷ Es bari boor'a Daamni Yesus Kiristoosni am-
manon yooson oodet faasefeti kabaasik Ha'oosi
Ayyanani imaassin isarnu nittok aafa yo'una
wuza.

⁸ Daamni Yesus Kiristoos wolle yoona wono
zinniti foonto sinna koi'baasta kar'ananneen
chimma footik nittotin zagawowa.

⁹ Naaba sina Daamni Yesus Kiristoosneen ane isarniti foonak nittotin teege Ha'oos amanam-towa.

Kiristanani Meeni Ganeyasi Zagte Oor Oor Kesa

¹⁰ Aytaasakitono! «Nitto ganeyaassi oor oor kesa foonata; zuuttamnitiise isa nibaknawa isa safarakna chimma footi» yira Daamni Yesus Kiristoosni sunaasik shiiphefawungwa.

¹¹ Aytaasakitono! Nitto ganeyaassi faasso faanamato Kelo'eni keer feese meyakini odengwa.

¹² Esiis dey nitto isa isarnitiis: «Ta Phawulosnir, ta Aphphilosnir, ta Phexirosnir, ta Kiristoosnir» yisefeti.

¹³ Eekan Kiristoos bagtewoso? Phawulos nit-tokwa iyaat suuttewoso? wedey haphuktesetiis Phawulosni sunaasikoso?

¹⁴ Ta Qersiposnawa Gayosnatano nittoossin ooninnu aane haphqut sinna boor'a Ha'ooson galattefawungwa.

¹⁵ Es bari boor'a: «Ta Phawulosni sunaasik haphuktengwa» yire makok chimnir oonu aafe. [

¹⁶ Futowa; Isxifanosni keerki meyanon haphqingwa; es baassoneen oom haphqina asu foobaason aane yaadatotwa.]

¹⁷ Kiristoos taan wosinaas misirachchuni kaamaason makonaktano haphqunaktawa; Kiristoosni mesqeliis shima sinna fui'tonoynamato misirachchuni kaamaason makefanaas asuni techmak beste wollaktawa.

Kiristoos Ha'oni Techumnawa Hugnane Sin-namato

18 Mesqeliisi kaama tishuni baassok gowwumma sinnatu faadtefa; sinuntano faruni innok Ha'oni hugnawa.

19 «Techumni meeni techmaason tishkuna; aruni meeni aruuson shima zaguna» yistera tichchewa.

20 Eekan techum ayfeso? Tumaasi aru dey ayfeso? Han neyaasi tu'ninyinya ayfeso? Ha'oos han daastaki techmaason gowwumma aane zaguwanoso?

21 Han daastaki asuni meya baasso teetni techmaasik Ha'ooson aru chimonoytemato Ha'oos techumbaasik kulfiwa. Sinuntano gowwanimated faadtefe inno makefeni Misirachchuni kaamaasik amanefe baassotin fatunak Ha'oosi fiqadi siniwa.

22 Aagenu sinfaanane Ayhudni meya biistera artonoy wuza biya sholseter; Girikni meya dey techmatu sholsefe.

23 Sinuntano inno Kiristoos innokwa iyaat suutobaasontu makefeni; es bar dey Ayhudni meyak tuusa; Girikni meyak dey gowwumma.

24 Sinuntano teegte baassok Ayhud sinoto Girikni meya Kiristoos Ha'oosi hugnanewa techumnewa.

25 Esiis dey Ha'oosi gowwumma asuni meeni techmaastan denalowa; Ha'oosi hopiya asuni meeni hugnaastan denalowa.

26 Aytaasakitono! Ha'oos nittotin teegenakabaasik awune fe asu sinetimated yaadatotiwa. Asuni safarasimated nitto ganeyaassin showoni meya techum wedey chim wedey arto asu aafsetiwa.

²⁷ Sinuntano Ha'oos techumni meyanon iishshunak han daastak gowwanimato faadtefe asuni meyanon koriwa; chim meyanon iishshunak han daasta feese hopinimato faadtefe baassotin koriwa.

²⁸ Ha'oos han daastaki asuni meeni sinak ulfinto yiste wuzasikitonon ulfintonor sinbaason besuk; han daastak daakalo sina baronnawa kashistosonna dey shima sina wuzason koriwa.

²⁹ Es baron dey zaginaas oonu Ha'oosi sinak basa teetni safaraasik teetonoynamatowa.

³⁰ Sinuntano Ha'oos nittotin Kiristoos Yesusneen ane isarniti foonak zagi. Es bari boor'a Ha'oos Kiristoos Yesusnin innok techumni; ookoni, kortoninawa furinina sinanak zagiwa.

³¹ Ese matsafaas dey: «Teetefe bar Daamiisik teetowowa» yistera tichchenamatowa.

2

Suutte Kiristoosni Chowaason Mako

¹ Aytaasakitono! Ta nittoki yaana kabaasik Ha'oosi aacho chowanon makenaas wolumni chimak wedey akama techumni besuktawa.

² Nittoneen ane faana kabaasik Yesus Kiristoosnawa esiis dey mesqeliista suuttere kitubaason-tano ooma isa wuzanu arunoynamato buggira faanar.

³ Es bari boor'a nittoneen faana kabaasik hopi sinna digaknawa akama qorkuknatu faan.

⁴ Wolumnaasewa makonaase asuni techmaknawa wolumni kaatuk sinnoynaron Ha'oosi Ayyanani hugnanon ammanon besukwa.

⁵ Es baron dey zaginaas amantontiis asuni techumta kaputter sinnoynaron Ha'oni hugnak teetonakwa.

Ha'oni Techma

⁶ Sinuntano ayyanak fook chim asuni meyak techmaktu makefeni; sinfanaknu makefeniis dey han daastaki techma wedey tishuni meeni han daason ha'sisefe baasso techmaktawa.

⁷ Sinuntano inno makefeniis Ha'oos zeemma showo neyaneen inno ulfinaasik hoossina barewa aachera fa Ha'oosi aacho chowni techmanonwa.

⁸ Han daason ha'sife baasso ganeyaassin han techmaason arir oonu aafe; arisete sinfaanane ulfinni Daamiisin suutosone kabatawa.

⁹ Sinuntano Matsafaassi:

«Aafa binoynaason;

odo odonoynaason,

Asuni niba safaronoynaason;

Ha'ooson shunfe baassok hoossiwa»

yistera tichchenaasimatowa.

¹⁰ Sinuntano innok Ha'oos Ayyanbaaski kamo aacho chowaason ammanon besiwa. Ha'oosi Ayyana akamanon aacho sina Ha'oosi chowanonnu fu'onoy zuutira tu'nir.

¹¹ Asuni chowaasik sinar sinfaanane basa teetni ayyanaastano ooma basaassi fa safaraason arifer oonso? Esiisimato Ha'oosi Ayyanatano Ha'oosi safaranon arunir oonu aafe.

¹² Ha'ooskin imte wuzason arunik Ha'oosi Ayyananontu ephphataani tano han daasi ayyananon aane ephphatoweniwa.

¹³ Es bar dey ayyanani wuzason ayyanak feesefe baassok makefeniis asunikin bestefa

techmaasik sinnoynaron Ha'oni Ayyanaaskin bestefa techmakwa.

¹⁴ Sinuntano Ha'oosi Ayyana basaassi tishifaan ashak feepe asu Ha'oni Ayyanaaskin imtefa wuzasikitonon aafa ephphetoona wuza. Es imte imaa-son tu'untefeniis Ha'oosi Ayyanaki kamo sinna boor'a es asus yaadatonak aafa chimanawuza.

¹⁵ Sinuntano Ha'oni Ayyana basaassi faana bar zuuttambaase asin tu'nir. Sinuntano bar teetbaasik ooniknu aane tu'untefe.

¹⁶ Esiis dey:

«Daamiisa safaranon;

oo aruk chimnirinso?

barin kiituk chimnir oonso?»

yistera tichchenaasimato,

Sinfanaknu Kristoosni nibaas innoossi faarwa.

3

Qoroxosni Betekiristaniissi Oor Oor Kesa Kabi

¹ Aytaasakitono! Ta nittotin assifana kabaasik ashni safarak Kiristoosnik hashnu chimma yeronoy daaga naanggota sinetimatotano Ha'oni kaamak feesefe baassosimato zagiratawa.

² Chima muuni muuk chimnoy daaga naanggota sineti boor'a ta nittotin shaabotano chima muu aane maasutwa; Hashnu sinfanak nitto chima muuni muuk chimnorwa.

³ Nitto hashnu ashni safarak fe asuwa; nittotna nittotna wol koononewa karakkarone faar sinna boor'a ashni safarak feer sinnititanoso? Wostet faaseti wostoos dey baaki asunimatotanososo?

⁴ Isar: «Ta Phawulosnirwa» oomiis dey: «Ta Aphilosnirwa» yifena kabaasik baaki han daastaki asu sinnitisontanososo?

⁵ Shakafooti Aphilos aambenso? Phawulos aambenso? Baasso nitto amanotik zagi wostinynyawa; isa isarbesiis wostesefees Daamiisik baassok imna wostosongwa.

⁶ Ta tokin; Aphphilos aka ushi; sinuntano dichiis Ha'ooswa.

⁷ Es bari boor'a wostoosik arkiron sholsu sinaas dichi Ha'oostano toka bar sino aka ushi bar isa wuzanetawa.

⁸ Toka bar sino aka ushi bar isa barwa; isa is- arbaas wostobaasimato teetbaasi waaganon eph-phetoona.

⁹ Inno nittoneen ane Ha'oosik woste wostinynyawa; nitto dey Ha'oni foshnewa Ha'oni shu'uni keyanewa.

¹⁰ Ha'oos taak imna bari otmaasimato isa haxxe shu'ni keya keer'fe keer'inynyanimato kaputta kunsin; oomiis dey ta kaputna kaptaastatu keer'ana. Sinuntano isarba isarbaas es barista aakkak keer'anamato arunak sholsifa.

¹¹ Isarga kaputte kaptaastan oonu ooma kapta kaputanak aafa chimanawuza; es kaptaas dey Yesus Kiristooswa.

¹² Oonu es kaptaasta warqek wedey birrik; ma'a ulfinto shu'ak wedey i'ok; shaa'ak wedey agadak keer'ar feefaanane;

¹³ Asu isa isarbaasa wosto ammanon kessa bestona mangsuni kar'ni wona yoona; es wono isa isarbaasa wosto awunefaar sinnamato geyak fattantera biistona.

¹⁴ Isa shu'ni keya keer'inynyaas kaputna kaptaasta wostena wostoos geyak fattantera kiich-chonoy fu'tefaanane shu'ni keyaason keer'a bar waagbaason danana.

¹⁵ Wostobaas geyak kiichchena keer'inynyaas danana waagbaason turkuna; sinuntano bar teetbaasik geyaassi kamo aatfaat kiichchonoy fu'te asunimato sinana.

¹⁶ Ha'oosi betemeqdesi sintimatonawa Ha'oosi Ayyana dey nittoossi faafanamatona aane aruwetinoso?

¹⁷ Ese oonu Ha'oosi betemeqdesinon boganane Ha'oos barin bogarwa; Ha'oosi betemeqdesi kortowa; es betemeqdesiis dey nittowa.

¹⁸ Nittoossin oonu teetbaason eshanaatawa; han daastaki techumni gefaasik techum sinne bester feefaanane Ha'oosi futo techmanon dananak teetbaason gowwa zagire faaduwowa.

¹⁹ Han daastaki techmaas Ha'oosi sinak gowwummawa; esiis dey matsafaasi: «Ha'oos techumni meyanon mangubesiisik baassotin ephanawa» yistera tichchenaasimatowa.

²⁰ Esiisimato dey: «Daamiis techumni meeni safaraas shima sinnamato arifewa» yistera tichchewa.

²¹ Es bari boor'a zuuttambaase nittor sinna boor'a oonu asunik teetonatawa.

²² Phawulos sinfenak Aphilos sinfenak Phexiros sinfenak han daas sinfanak kaa sinun kitu sinun; hashti fa bar sinun yooni bar zuuttambaase nittorwa.

²³ Sinuntano nitto Kiristoosnir; Kiristoos dey Ha'onirwa.

4

Kiristoosni Wostinynya

¹ Ese asu zuuttambaase innotin kiristoosni wostinynya sinnimatonawa Ha'oosi aacho

chowanon ammanon kisire makoni ha'suni hugna imtena adara epho asu zagire faadunak sholsuwa.

² Adara epha asuni meya amanamto sinne besosonektu sholsifawa.

³ Ta chowaasik sinfaanane nittonu tayista mangsu kar'efetik wedey oom asu tayista mangsu kar'fenak isa giddina aafawa. Futoosik ta ta teetaasik tayista mangsu kar'anak aafa chimanawuza.

⁴ Ta arifanaasimato sinfaanane kanunaas aane taan waqasefawa; sinuntano tayista mangsu kar'niis Daamiis koi'bawa.

⁵ Es bari boor'a wonbaas kar'noyfeen wedey Daamiis mangsuni kar'ak yoonoyfeen ooniistanu mangsu kar'atiita; bar yeena wono talmaassi aachera fa aacho chowaason chaarefaasta kisunawa. Asuni meeni nibaassi aachera fa safaraason ammanon kisuna; es kabaasik asu isa isarbaasik Ha'ooskin sholsu galata dananawa.

⁶ Ayni meyane! Nittok ke'ni wuzaasikwa iyaat han chowaasik taannawa Aphilosninna beso zagira makengwa; es baron dey zaginaas: «Tichche baristan aatataata» yifa kiitooson innokin aruti iyaatwa. Es bari boor'a isa asunik teetefaat oomiisin kashshutik aane sholsifawa.

⁷ Ne oomiisatan awuk arkutasso? Oomiiskin ephphatoonota wuza aambanso? Eekan zuutambaase asin ephpha tataas oomiiskin sinnanneen oomiiskin ephphetoonoy asunimato awuniron teetefasso?

⁸ Hashnu nittok sholsi wuzason zuutira dantiwa! Hashnu otum sinetiwa! Innoostan oor kessa taato sintiwa! Futok taato sineti sinfaanane inno dey nittoneen ane taatonir sinna boor'a ma'ar

sinana kabawa.

⁹ Es bari boor'a Ha'oos wosi sina innotin kituni mangsuni kar'a baassosta ka'ten wortosone dima oottere hamefe asuni meeni ganeyaassin koi'niis inno sinnimatotu taak bestefawa. Es baristan kabi chowa han daa zuuttambaase asiissi Ha'oni wosiyanu sinfanak asuni meeni sinaknu sinfanak biistoni wuznimato sinna bestefeniwa.

¹⁰ Inno Kiristoosnikwa iyaat gowwa sinniwa; sinuntano nitto Kiristoosniki kamo techumni meya sinetiwa; esiisimato inno hopini meya sinniwa; sinuntano nitto dey chimni meya sinetiwa; nitto dey ulfinto sineti; sinuntano inno salphater sinni.

¹¹ Es sa'atiis kar'ana kabaneen maktefeni iktefeni; atatu sinfeni; ichchefeni; duuni keeni turkuk rakkatefeni.

¹² Inno teetni kushusik wostok hopifeni; Innotin erwisefen eebbisifeni; kabgisefen fakifeni;

¹³ Innotin me'efeennawa sunniison mangsise-feenna ma'ak baassok wolgifeni; esseen hawung kar'a han daastaki ha'to wuznewa futtera ha'te diimne sinniwa.

¹⁴ Ta han baron nittok tichinaas shunto naanggotna sinetimato zagira kiitunaktano nittotin iishshunak iyaattawa.

¹⁵ Awunu sinun Kiristoosniki kamo showo zoonsinti feefenaknu showo abanti aafewa; sinuntano ta nittotin Kiristoos Yesusni misirachchuni kaamaasik kooningwa.

¹⁶ Es bari boor'a ta besosik zoonustotik shiiphe-fawungwa.

¹⁷ Es chowaasik shuntonawa amanamtona sina dey Daamiisik naata Ximotiyosnin nittok wosingwa. Daa daassinawa showo betekiristani-issina ta assifanaysimato bar ta Kiristoosniki

kamo danna gaddo kaasi ajajinon nittok yaadas-sunawa.

¹⁸ Nittoossin isa isaas nittotin biyak yoo beya-narne faar sinna baassok bestefaan beegantok tuumesetewa.

¹⁹ Sinuntano Daamiisa fiqadi sinfaanane han ta'a wonaassi nittoki yoonawa. Es kabaasik es beegantefe baasso wollaason koi'ba sinnoynaron hugnabesisonnu arunak sholefawungwa.

²⁰ Ha'oosi taato wolumni chowatawa; sinuntano Ha'oni hugnawa.

²¹ Sholefetiis aambanso? Ke'oni haaro ephpha nittoki yoonakingwa wedey keeshtanaknawa garamni ayyanakna yoonak sholefetiso?

5

Amanynyini Meeni Ganeyaassi Zagte Mangu Amala

¹ Nitto ganeyaassi iichu sooloni zina faanamato wolumtedifarwa. Es effatena sooloni zinaas Aazabni meeni ganeyaassinu aane zagtefawa. Esiis dey tushni intobaason asu zagire epha asu feer yistewa.

² Eekan es effatena iichu chowa nitto ganeyaassi feen awuniron begantefetiso? Esiistan han chowaasik suumotik aane sholsuwanoso? Es effatena wostooson zagi asusin nitto ganeyaassin oor kisutiwa.

³ Awune faaron ta ashak nittoneen ane fo beyfanaknu ayyanak nittoneen anetu fawungwa; nittoneen ane faanarimato sinna es effetena wostooson zagi asusata Daamiisa sunak mangsu kar'ingwa.

⁴ Zuuttesefeti kabaasik ta dey Daam Yesusni hugnaasik nitto ganeyaassi ayyanak faanar sinna boor'a;

⁵ Boor'ak tuumme fe han asusa asha tishunak Sexanaasik aatira imatik sholsuwa. Es baron dey zagusotiis Daam Yesus mangsuni kar'ak yeefena wono es asusa kaa farunakwa.

⁶ Ese teetontiis ma'artawa; kiisku maso akama tushooson kisifanamato aane arifetinoso?

⁷ Hashti sintiisimato masoba foonto ora tushonimato sinatik hajifa di masooson tishkutiwa. Innok Faasikani fantu sina Kiristoos shuktewa.

⁸ Es bari boor'a mangunewa begantone tumma hajira di masoosik sinnnoynaron masoba foonto garamaknawa futokna kixxani eeboson ulfinsuniwa.

⁹ Zeemoti nittok tichina wosiyaassi soolefe baassoneen ane isar sinatiita yira faanarwa.

¹⁰ Es baron yinaas zuuti ephpha han daastaki soolsefe meyaneeen wedey joorsefe baassoneen wedey wiisni meyaneeen wedey koo'lo shiiphisefe meyaneeen ane footiita unatawa.

¹¹ Sinuntano ta hash tichina Amanynyini meya yistefaat soolesefe baassokin wedey jooresefe baassokin wedey koo'lo shiiphsefe baassokin wedey asuni suna mangsisefe baassokin wedey zayeseefe baassokin wedey bo'eseefe baassoneen ane isar sinatiitawa. Es effetena asuni meyaneeen ane muunu muutiitawa.

¹² Kiristanani meeni maabaraasi gerakalo feese asuni meyaasta mangsu kar'niis ta oonso? Kiristanani meeni keerkalo feese asuni meeni chowaasik nitto teetnitiisik mangsuni kar'a chimtirtanoso?

¹³ Gerok feese asuni meeni chowaasik mangsu kar'niis Ha'ooswa; ese matsafaas: «Mangu asusin nitto ganeyaassin oor kisutiwa» yifawa.

6

Kiristanani Meeni Ganeyaassi Fa Malata

¹ Nittoossin isaas kiristana sina aybaasneen ane faassefaanane chowbaason kiristanani meya biyonek zagustan malatonak amanonoy meeni shonggosta hamanak aakkak chimiso?

² Ha'oni asuni meya han daasta mangsu kar'onemato aane aruwetinoso? Eekan han daasta mangsu kar'atir sinfeen han garo wuzason mangsuni kar'a hoputiroso?

³ Ha'oni wosiyaastanu mangsu kar'anir sinnamato aane aruwetinoso? Eekan han daastaki chowaasik aakkak daysira mangsu kar'a beyanisso?

⁴ Ese nittotna nittotna wol faassefaatine kiristanani meeni maabaraasneen gerakalo sina kashisto asuni meeni sina chownitiison aakkak tai'sutisso?

⁵ Han baron makenaas iishshukwa iyaatwa. Shakafooti ganentiissi ayni meyanon mangsuni kar'a chimni aruba faana asu aafenoso?

⁶ Sinuntano ay aybaasin malatere amanonoy meeni mangsu kar'ni keer ephphe hama shol-sunoso?

⁷ Ese nitto ganeyaassi nittotna nittotna wol malatera karakkaret foontiis teetbaasik salphinawa. Es baristan nitto miir'amefaatine wayy-atanoso? Esiisimato nitto eshtefaatine wayy-atanoso?

⁸ Sinuntano nitto ayniti sina kiristanani meyas-tanu miir'onewa eeshshune katidifetirwa.

⁹ Jallisife baasso Ha'oosi taatosi aafa girsone wuza sinnamato aane arifetinoso? Es chowaasik eshtotiitawa; igife baasso; soolefe baasso wedey koo'lo shiiphsefe baasso wedey gerkesefe baasso wedey argarna argarna wol ephefe baasso;

¹⁰ Wedey wiisni meya, wedey joortuni meya, wedey zayini meya, wedey asuni suna mangsisefe meya, wedey bo'inyanyani meya Ha'oosi taatosi aafa girsone wuza.

¹¹ Nittoossin isa isaas esiisimato sinna faasetir. Sinuntano hash Daamni Yesus Kiristoosni sunaasiknawa Ha'oniisi Ayyanakna boor'nitiissin mastetiwa; Ha'oosik korte korto dara sineti dey ooko sinetiwa.

Gerkesni Chowa

¹² «Zuuttambaase taak faqqadtewa; sinuntano zuuttambaase taak aafa ke'anawuza; zuuttambaase taak faqqadtewa; sinuntano aaffa wuzaasiknu boza sinna aafa ha'una wuza.

¹³ Muu katnirwa; kataas dey muunirwa» eekan; Ha'oos muuson gedda kataason gedda tishkunirwa. Sinuntano atuniis Daamni Yesusnirwa, Daam Yesus dey inno atunisir sinna boor'a atuniis gerkesni wosto wostonak aane sholsifawa.

¹⁴ Ha'oos Daam Yesusnin kitun kabgiwa; innotin dey hugnabaasik kitun kabgunawa.

¹⁵ Atuntiis Kiristoosni atuni bagto sinnamato aritirtanoso? Eekan Kiristoosni atuuson ephpha taamma soolefa mashkasusi atuneen isar sinanak zagu sholsunoso? Isanne aane sholsifawa!

¹⁶ Soolefa mashkasusneen ane kunfe asu barneen ane isa atu sinbaason aritirtanoso? «Hepobesiise isa atu sinonewa» yistera tichchewa.

¹⁷ Sinuntano Daam Yesusneen ane isar sinfe bar barneen ane Ayyanaasik isar sinfe.

¹⁸ Es bari boor'a gerkesaastan wokti; asu zagifena boor'aas zuuttera atubaastan gerakalotu zagife; sinuntano gerkesfe asus basa teetni atuus-tatu boor'a wostefe.

¹⁹ Nitto atuus Ha'ooskin ephpha taati barewa nittoossi fa Korto Ayyanaasi betemeqdesi sinnam-ato aritirtanoso? Ese nitto Ha'oosirteno nitto nit-tortewa.

²⁰ Bar nittotin waagaktu waagewa; es bari boor'a atuntiisik Ha'ooson ulfinsuti.

7

Ephne Girune

¹ Nitto taak tichiti chowaasik asu mashka-suneen ane kunu shakaanane ma'arwa.

² Sinuntano gerkesaastan wokak arqasu isarba isarbaas teetbari asuba foongwa; mashkasu is-arba isarbaas teetbari teegobay foowo.

³ Teego asubaasik zagunak sholsi baron kalanaatawa; esiisimato asus dey teegobaasik sholsi baron kalanaata.

⁴ Asus atubaas bar barirtawa; teegosarneengwa; ese dey teego atubaas bar basartawa; asubasirneengwa.

⁵ Chimma Ha'oni shiiphok hepontiise nittotna nittotna merkera garo wonniron sina shakaanane oor kesak isaas oomiisa mabtinon kalanaata. Es bari boor'a teetnitiison oodda

hopira Sexanak fattantonoytimato wolla isarik footi.

⁶ Han baron yifanaas dey ajajini sinnoynaron kiitowa.

⁷ Asu zuuttere tayisimato asu ephnoy feefaanane shunana kabawa. Sinuntano isarba isarbaasik Ha'oos ooma ooma imatu imiwa; isaasik isa tesa ima, oomiisik dey ooma tesa ima faarwa.

⁸ Girunoysewa teegobesi kitina mashkasusikitone asik yifanaas dey ekkatu unawa; girunoytamato sinna faasefaanane ma'arwa.

⁹ Sinuntano ashni eenantok kiichchoostan epha wayya sinna boor'a teetbesiison ha'su hopsefaatene ephotowa.

¹⁰ Epha baassok dey imana ajajiis haniiswa; es ajajiis dey Daamiisartano taartawa; giri asu teegobaasatan oor kesanaatawa.

¹¹ Oor kesfaanane girunoynamato teetbak duun wedey teegobaasneen ane ganon; esiisimato teego asubaason kofkunatawa.

¹² Sinuntano oomni meyak Daamiis sinnoynaron ta teetnaasik yifanaas ekkawa; isa kiristana sina asu kiristana sinnoy asuba faafaanane-nawa ane foonak sholefaananena gafkunaatawa.

¹³ Kiristana sina mashkasu kiristana sinnoy teegobay feefaananenawa ane foonak sholefaananena barin kofkunaata.

¹⁴ Kiristana sinnoy teegoos kiristana sina asubaasi boor'a Ha'oni asu sinana; kiristana sinnoy asus dey kiristana sina teegobaasa boor'a Ha'oni asu sinana; ekka sina shakaanane nitto naanggotaas Ha'oni naanggota sinanak aafa chi-manawuza. Sinuntano es barik faasefaatine

naanggotnitiis Ha'oni naanggotawa.

¹⁵ Kiristana sinnoy bar oor kesianak sholefaanane oor kesowa; sinuntano es barik kiristana sina teegoos sino kiristana sina asus aaffa chowaknu giddik aafa oodtona wuza. Ha'oos innotin teegenaa nagak foonikwa.

¹⁶ Ne kiristana mashkasuse; kiristana sinnoy teegoneesin awuzakne fu'otatto awu arifasse? Ne kiristana sina arqasuso! Kiristana sinnoy asunee-son awuzakne fu'otatto awu arifasso?

¹⁷ Isa isarbaasik Daamiis barik imna imaasiknawa Ha'oos barin teegen kabaasik feena foosikna foowowa. Betekiristaniisikitok imna tumaas esiiswa.

¹⁸ Oonu haarko kunnanneen orfo teegter sinfaanane haarko kunnoyne feer sinne safaronata. Haarko kunnoy teegter sinfaanane haarko kunnanak sholonatawa.

¹⁹ Haarkoni kuna sinun kunu beya waagba aafawa. Arki wuzaas Ha'oosi ajajinon oodawa.

²⁰ Es bari boor'a asu isa isarbaasik Ha'oos barin teegen kabaasik feenamato chimme foowowa.

²¹ Ha'oos neen teegen kabaasik boz sinna faataroso? Sinfatanewo giddiba aafa rakkato-taatawa. Sinuntano birmadumma kesni ixa danfaatane es ixaas neyistan aatanatawa.

²² Boz sinne feen Daamiisik teegte asus Daamiisik birmadumma daniwa. Esiisimato dey birmadumma kesse feen teegte asus Kiristoosni bozwa.

²³ Waagak waagteti boor'a asuni boz sinati-itawa.

²⁴ Es bari boor'a aytaasakitono! Asu isa isarbaasik teegtefena kabaasik feena foosimato

Ha'ooseen ane zagire foowowa.

²⁵ Girunoy wedey ephnoy diise baasso chowaasik Daamiiskin ephna ajaji aafawa. Sinuntano Daamiisa fakiyak amanamto asu sinnamato ta kiitooson imanawa.

²⁶ Hashti faani wonaas rakkoni wona sinna boor'a asu ephnoy wedey girunoy baak foos ma'arne faarwa.

²⁷ Sinfanaknu asu ephit sinfaatane gafkuk sholotaata; asu aane ephe sinfaatane ephak shlotaata.

²⁸ Sinuntano ne asu ephaatane boor'a sinar utawa. Esiisimato isa durba nawa girifaanane boor'a sinar utawa. Sinuntano asu ephfe baasso han daastak showo fooni rakko baassotin epharwa. Ta safaraas dey es rakkoossin fui'totikwa.

²⁹ Ayni meyan! Ta nittok makonaas haniiswa; wonaas kawuniwa; Hanneen ekalok asuba feena bar asuba foontonimato sinne foowowa.

³⁰ Waassefe baasso waasunoy baassosimato sinoto; girsefe baasso girosonoy baassone feer sinne foosoto. Koda waagsefe baasso isa kodabesi foonto zagire faadusoto.

³¹ Han daastaki baassok ke'fa wuzason baassok ke'nor zagire faadusoto. Hashti fa han daastaki wuzaas aatarwa.

³² Es bari boor'a isa safaraknu rakkatonoy foosotik sholefawungwa. Asu ephnoy bar Daamiisin girsuna wuzatu sholefe sinna boor'a safarabaason Daamiisik sholsu wostotatu feeshifewa.

³³ Sinuntano asu epha bar asubaason girsuk han daasta fa wuzasontu safarefe.

³⁴ Es barik safarabaas heppik bagtewa uwa. Esi-
isimato girunoy mashkasus wedey durba nawa
ashbaasiknawa kaabaasikna kortera Daamiisar
sinak sholefana boor'a safarabaason Daamiisik
sholsu wostoostatu feeshifa. Sinuntano girira
di mashkasus teegobaasin girsunak sholefana
boor'a safarefana safaraas han daastaki wuza-
songwa.

³⁵ Ta nittok han baron makefanaas birmadum-
mantiison kalak sinnoynaron nittok ke'ana ukwa.
Safaranaas dey nitto ma'a fo footiknawa safaran-
tiis bagtonoyaron tuuma nibak Daamiisik wos-
totiknawa.

³⁶ Isa asu teegere duusina durba nawaason
epha beyanak bugginanneen orfo es baron za-
gubaas nawaasik ma'aron aane zaguwe sinbaa-
son safarefanane baron ephak fa safarabaas
zaga sinfaanane baasso ephne girune zaguus
ma'ar sinna barik bestefaanane sholefanaasi-
mato ephanane boor'a aafwa sinanawuza; epho.

³⁷ Sinuntano isa asu nibbaassi zagifaaanane gid-
disuni wuza tishifaaanane bar sholena baron yee-
tuk chimfaananenawa teegen nawaason epha
beyanak buggifaaanane ma'aron zagi.

³⁸ Es bari boor'a asu ephpha bar ma'arontu zagi;
sinuntano ephnoy bar dey akama ma'arontu zagi.

³⁹ Girira di asus teegobaas kaak feenananneen
ephne girune asi tumaasik taatera fa. Sinun-
tano teegobaas kitifaaanane bar sholena asuniki
girunak birmadummaba faar; sinfanaknu giruna
asus kiristana sinanak sholsuwa.

⁴⁰ Sinuntano ta safaraasik girunoy baak di-
ifanane arkiron girera foona. Ha'oosi Ayyana
tayissi faarne faar sinnatu taak bestefawa.

8

Koo'lok Shukte Asha

¹ Koo'lok shukte ashni chowaasik sinfaanane futoosik zuuttamniise aruni faarwa; aruus ge'sir; sinuntano keeshtanaas chinir.

² «Aruna faar» yit safarefe asu feefaanane arunak sholsinaasne faaron hashnu aane aruwewa.

³ Sinuntano Ha'ooson shunfe asus Ha'oosi sinak arto sinanawa.

⁴ Es bari boor'a koo'lok shukte ashni muuni chowaasik sinfaanane koo'loos teetbaasik kaaba foonto sinnamatonawa isa Ha'oostano ooma Ha'o aafa sinnamato arifeniwa.

⁵ Awunu sinfanak ha'o sinnoy ha'o yistera teegtefa showo ha'onewa showo daamni meena den samak sinun daastak feeseter yistefa.

⁶ Sinuntano zuuttambaase asin tesi isa Aba Ha'o ko'iba innok faar; inno dey barir sinniwa. Esi-ismato zuuttambaase bariki kamo testernawa inno dey barik faafeni isa Daam Yesus Kiristoos koi'bawa.

⁷ Sinuntano es baron arsefees asuni meya zuuttambaasetewa; isa isaas hashnu koo'luni shiipho dostesete boor'a ashaason meesefees koo'lo shukter zagirewa. Es bari boor'a kanubesiis hopiya sinna boor'a kiinefe.

⁸ Ese Ha'ooski tai'suniis muutawa; muubeyfenik innok yo'uni wuzni aafa; maafenik buui'suni wuza aafa.

⁹ Sinfanaknu han birmadummantiis amantok zagunoy asuni meyak tuusa sinnoynamato teetni-tiison oodtiwa.

¹⁰ «Aruna faarwa» iyaat koo'lok shukte baron koo'lo shiiphfefana dimaasta maafeen amantobaasik zagunoy asu neen biifanane es wosteta wostonees asus koo'lok shukte baron muunak zagitartanoso?

¹¹ Es bari boor'a ne: «Ta aruwa» uneesik Kiristoos kitina barinnawa amantobaasik zagunoy kiristanaasinna tishkirwa uwa.

¹² Esiisik kiristana aynitisakitonin miir'oknawa hopiya kanubesiisonna mazasuk Kiristoosnin miir'efetiwa.

¹³ Es bari boor'a muus kiristana aytaasin tuusa'sunir sinfaanane aytaasin tuusa'sunasneen isanne asha aafa muuna wuza.

9

Wosi Sina Asuni Mabti

¹ Ta birmadummana faana asutenoso? Ta wositenoso? Daamni Yesusnin aane biyutoso? Daamiiski kamo hopinaasi gaana nittoteno?

² Daamiisik ta wosi sinnaason besifa maatami nitto sineti boor'a oomni meyak wosi sina beyfanaknu nittok futoosik ta wosiwa.

³ «Wosi sinni mabtine aafawa» yire taan fafesidifer feesefaate ne makona wolguus haniiswa;

⁴ Eekan inno muuniknawa ushanikna mabtini aafanoso?

⁵ Ooma wosini meenimatona wawa Daamiisa ayni meenimatona dey Kefaniisimato amane asu zoon-sire kutuk mabtini aafanoso?

⁶ Wedey wostoni wostok kabet fo sholsinaas Barnabasnawa taakna koi'banoso?

⁷ Damozaba foontonon teetbari waagak meya taar'o sinne wostonir oonso? Wayini tokke gaanbaason muunor oonso? Miya keemfegedo miibaasi shaabonon ushnor oonso?

⁸ Han baron makefanaas asuni safarani-matonoso? Tumaas dey ekka aane makefanoso?

⁹ «Meyaason ichfa gachuwaasi noononon taar'ataatawa» yistera Museni tumaassi tichchewa; eekan Ha'oos es baron yinaas gachuwasikitok safarefaatnoso?

¹⁰ Ha'oos es baron yinaas innok safarena boor'atanoso? Bulefe bulinynyaas abdik bulonak meyaason ichfe bar abdik ichanak; zuuttambaase haa'obaason dananak es tichche bar futoosik inno boor'awa.

¹¹ Inno nittoossi Ha'oosi chowanon bukaat nitto ashni eebbaason kar'anine akama wuza sinbanoso?

¹² Oomni meya han wuzason nittokin haa'osone mabtibesi faar sinnanneen eekan inno aakkak es baristan denalo mabtini fo beynirin? Sinuntano inno han mabtison aane ephpha ke'eniwa. Es baron zaginiis dey Kiristoosni misirachchuni kaamaasi tagit hamaastan yeronoynamato safarok zuuttambaase asin fakira chimani ukwa.

¹³ Betemeqdesiissi wostesefe baasso muubesiison betemeqdesiissin danesefematonawa shoo'aasta maa'a imefe baasso dey es maa'aastan haa'ere meesefematona nitto aritirtanoso?

¹⁴ Esiisimato dey misirachchuni kaamaason maksefe baasso muubesiison es wostesefe wostoossin danonemato Daamiis ajajewa.

¹⁵ Sinuntano ta es mabtisikitosin isaronnu aane ephphatootwa. Han baron tichinaas es mabti-naas awuniron zagtonoy fui'teson uktawa. Asu

ta teetena teetonaason shima zagubaastan kiti-faanane taak wayyawa.

¹⁶ Misirachchuni kaamaason makonaasik aafa teetona wuza; makefanaas gididi sinna boor'awa. Misirachchuni kaamaason mako beyfaanane haybutangwa.

¹⁷ Misirachchuni kaamaason asu taan giddisunoyaron shunak makefaanane hopinaas waagba foonawa. Sinuntano giddik zagifaanane taak imte adarasontu koi'sintano ooma zagina wuza faarwa utawa.

¹⁸ Eekan, hopinaasi waaga aambanso? Ese hopinaasi waaga misirachchuni kaamaason makonaasik taak fa mabtinaason beyfaat misirachchuni kaamaasi makoni wostonaason kaastoni waaga foontonon baak makonaaswa.

¹⁹ Ta ooniknu boz sinnoy birmadumma kesse fe asuwa; Sinuntano taak chimtenaysimato showoni meyanon wolgukwa iyaat zuuttambesiise asi boz siningwa.

²⁰ Ayhudni meyaneeen sinfana kabaasik Ayhudni meyanon fu'onak Ayhud sinin; Ta tumaasi daakalo sina beyfanaknu tumaasi daakalo feese baassotin fu'onakwa iyaat tumaasi daakalo feese asuni meenimato siningwa.

²¹ Ta teetnaasik Ha'oosi tuma feenarnawa Kiristoosni tumaasi sikalosi fe asu sinfanaknu tumabesi foonto Aazabni meyanon fu'okwa iyaat tumaba foonto asunimato sinin.

²² Amantok hopi sina baassotin fu'okwa iyaat hopini meyanee feer siningwa. Taak chimtenaasne faaron isa isaasin fu'okwa iyaat zuuttambesiiseene ane zuuttambaase asin sinin.

²³ Es baron zuutira ekka zaginaas

misirachchuni kaamaasi eebbanon haa'ak
Misirachchuni kaamaasikwa iyaatwa.

²⁴ Aato aato eelaasik zuuttambesiise
eelefematonawa es eela baassossin isa bar
bar wossumaason ephpheteefenamatona
aritirtanoso? Es bari boor'a nitto dey
wossumaason ephphetook eeltiwa.

²⁵ Haato haatoni eelak hooresefe baasso
zuuttere akamanon faya leejjitu ephefe; Baasso
ekka hopisefees tishuni ulfinni wossumaason
danonekwa. Sinuntano inno hopifeniis tishunoy
koi'ba foontonon fooni ulfinni wossumaason
dananikwa.

²⁶ Es bari boor'a ta hamma kar'ana dimaason
arunoy asunimato shimanon aafa eelana wuza.
Siruson gumme ki'fe asunimato baak aafa kabona
wuza.

²⁷ Es bari boor'a oomni meyanon aato aatooski
teegenanneen orfo ta teetnaasik ha'ter sinnoy-
namato atunaason ke'ira taak ajajamonak zagu-
nawa.

10

Koo'looson Shiipho Aane Sholsifa

¹ Aytaasakitono! Abaniisakito sharuusi daakalo
zoonustesetematona zuuttambesiise she'a
baariison finetesimatona nittotin yaadassunak
sholefawungwa.

² Museneen ane isar sinak es sharuusinawa
baariissina haphuqtesete.

³ Zuuttambesiise isa tesa ayyanani muuson
meesete.

⁴ Zuuttambesiise isa tesa ayyanani ushaason
ushete. Ushetees dey baassotin tustet fa ayyanani

kaa'oossin kesa barongwa; es kaa'oos dey Kiristooswa.

⁵ Sinfanaknu Ha'oos showoni meyak aane girowa; es bari boor'a dughobesiis ichma daassi hai'tera fu'te.

⁶ Baasso mangu wuza eenantesetesimato inno dey mangu wuzason eenantonoynimato han bar zuuttambaase innok teetnitiison oodti uni beso sini.

⁷ «Asuni meya muusoneknawa ushonekna diisete; likkineen denalo ushshe surire beceqok kabsete» yistera baasso chowaasik tichchenaasimato baasso koo'lok shiiphsetesimato nitto dey koo'lo shiiphotiitawa.

⁸ Baassossin isa isa meya gerkesere boor'a wostesetesimato inno dey gerkesni boor'a wostoniita. Baasso es baron zagsobesiisik baassossin isa wonaassi hepasire keeze kum asuni meya kitisete.

⁹ Baassossin isa isaas Daamiisin fattanesetesimatonawa zawak duptere kitisetematona inno dey Kiristoosnin fattanonitawa.

¹⁰ [Baassossin isa isaas unyisete boor'a betto ephpha ya Ha'oosi wosiyak tishisetemato nitto dey unyutiitawa]

¹¹ Es bar zuuttera baassosta kar'naas innok teetnitiison oodti uni beso sinanakwa. Tichchenaas dey neyaasi koi'ta fe innotin ke'ukwa.

¹² Es bari boor'a yerene feer sinne bestefe bar gandonoynamato teetbaason oodowa.

¹³ Asuniista kar'fa fatanastano ooma fatana aane nittoosta kar'awa; Ha'oos amanamtowa; es bari boor'a nitto giidostan denalo sina fatana nittoosta kar'anak aafa faqqadona. Fattante-

feti kabaasik dey fakuti hugna nittok imak fatanaassin kesati ugna nittok hoossunawa.

¹⁴ Ese koontasakitono! Koo'looson shiiphoostan woktiwa.

¹⁵ Han baron dey nittok makefanaas yaadatniti feenar sineti boor'awa. Es bari boor'a ta makefana baron nitto mangsu kar'tiwa.

¹⁶ Inno Ha'ooson galattok haa'efeni eebbani toofoos Kiristoosni hannaneen ane isarba faartanoso? Battera haa'oni kixxaas dey Kiristoosni ashaasneen ane isarba faartanoso?

¹⁷ Kixxaas isar sinbaasik inno dey han isa kixxaason haa'onir sinanneen awune faaron showo sinfeniknu inno isa atuwa.

¹⁸ Ese Israelni daraas zagina baron biitiwa; imtefa maa'aason meesefe baasso shoo'asneen ane isarbesi aafanoso?

¹⁹ Eekan; es baron yifeniis koo'lok shukte ashaas waagba faar unanoso? wedey koo'loos teetbaasik waagba faana wuzawa unanoso?

²⁰ Indaanewa! Aazabni meya maa'a imefees Ha'oosik sinnoynaron kitaasikwa. Es bari boor'a nitto kitaasneen ane isarniti foonak aane sholefatwa.

²¹ Daamiisa toofosin ushfat dey kitaasi toofosin ushatik aafa chimati wuza. Daamiisa madditan haa'er sinfaat kitaasi madditan haa'er sinatik aane sholsifawa.

²² Eekan es baron zaguk Daamiis koononak zaguniroso? Inno basaastan denalonon chim sinaniroso?

²³ Zuuttambaase faqqadtewa; sinuntano zuuttambaase aafa ke'anawuza; zuuttambaase faqqadtewa sinuntano zuuttambaase aane ke'fa.

²⁴ Asu isa isarbaas oomisikneen ke'ni wuza safarowoteno bar barik ke'iniison sholonatawa.

²⁵ Kanuntiissi safaro shakaat gabaasta waagtefa aaffa ashaason laphphebaatonoy muuti.

²⁶ Daasewa barista fa bare zuuttera Daamiisarwa.

²⁷ Amanonoy asu muu nittotin maasunak teegefaanane hamatik dey sholefaatine teshshena aafa muuson kanuntiissi safaro shakaat laphphebaatonoy muuti.

²⁸ Sinuntano isa asu: «Han ashaas koo'lok shukte ashawa» iyaanane es baron make asusa boor'anawa kanuntiisi boor'ana ashaason muutiitawa.

²⁹ Kanu yifanaas asusa kanunon unatano nitto kanuuson unatawa. Eekan oom asuni kanuni boor'a ta birmadummaasta mangsu kar'anaas awuni boor'anso?

³⁰ Ta Ha'ooson galattet muu maafaanane Ha'ooson galattena wuzaasik awuni boor'a waqastonasso?

³¹ Ese maafeti barik sinun ushfeti barik wedey aafa wuzasonnu zagifeti kabaasik zuuttambaase asin Ha'oosi ulfinak zaguti.

³² Ayhudni meyanon sinun Aazabni meyanon sinun Ha'oosi betekiristaninon sinun tuusa'sutiita.

³³ Ta zuuttambesiise fui'tosonek dey oomni meyak ke'nisontano taak ke'ni baron sholonoy asunik zuutira zagifana wuza zuuttambaase asik girsifanaasimato nitto dey esiisimato zaguti.

11

¹ Ta Kiristoosni besosik zoonustenamato nitto dey ta besosik zoonustoti.

Ha'oni Shiiphoni Sitiri

² Zuuttambaase asik taan yaadatefeti boor'anawa ta nittok assina assuuson mai'sira ephti boor'ana nittotin galattefawungwa.

³ Sinuntano arqasu zuuttambaase asi teet Kiristoos; mashkasusi teet dey arqasu; Kiristoosni teet Aba Ha'oos sinbaason arutik sholefan.

⁴ Teetbaason guufere Ha'o shiiphefe wedey raajini kaama makefe arqasu zuuttambaase teetbaasontu salphisifewa.

⁵ Esiisimato dey Teetbaason guufonoy Ha'o shiiphefa asu wedey raajini kaama makefa bar bari teetaasontu salphisifawa. Teetbaason guufonoy mashkasus sombaason fiittenarimatotu faadtefa.

⁶ Mashka asu teetbaason guufo shakaanane sombaason katongwa. Sinuntano sombaason kato wedey fiitto baron salphisuni wuza sinfaanane teetbaason guufongwa

⁷ Arqasu teetbaason guufonak aane sholsifawa; arqasu Ha'oosi besonewa Ha'oosi ulfinnewa. Sinuntano mashkasus arqasusa ulfinawa.

⁸ Mashkasus arqarnikintu bestetano arqasu mashkasunikin aane bestowe.

⁹ Esiisimato mashkasus arqasusiktu testetano arqasu mashkasusik aane testowe.

¹⁰ Es bari boor'anawa Ha'oni wosiyaasi boor'ana mashkasu ha'suni hugnani mallato sina guufoson teetbaasta duusun.

¹¹ Daamiisik fa kaaniisik mashkasus arqasu foontonon aafa foona wuza; arqasus dey mashkasu foontonon aafa foona wuza.

¹² Mashkasus arqasunikin bestenamato arqasus dey mashkarkintu koontefe. Sinuntano ar-

qasu sino mashkasu dey ooma wuzasnu zuuttera bestefanaas Ha'ooskingwa.

¹³ Ese nitto teetnitiisik mangsu kar'tiwa; mashkasu teetbaason guufonoy Ha'oni shiiphobaas sholsunoso?

¹⁴ Arqasu sombaason dichifaanane salphina sinnamato testoos teetbaasik aane assifanoso?

¹⁵ Sinuntano mashkasusik soma dichunak imtenaas teetbaason ukanak sinna boor'a sombaason dichifaanane barik ulfinbawa.

¹⁶ Han chowaasik karakkaronak shole asu feefaanane inno sinfenik wedey ooma Ha'oosi betekiristaniisikito sinun es baristan ooma dosteni wuzni aafawa.

Daamiisa Meeta'u

(Mat. 26:26-29; Mar. 14:22-25; Luqa. 22:14-20)

¹⁷ Sinuntano zuutfefeti kabaasik miir'anittano ma'ariri sina beyna boor'a han ajajiison imfanaas galattefatwa.

¹⁸ Zuuttambaase asiistan zeemman isa kuphamak zuuttesefeti kabaasik nitto ganeyaassin oor oor kessa faanamato odengwa. Es odena wuzaas bagga futo sinnamato amanefawungwa.

¹⁹ Futo sina baasso oo sinetemato oor kortere artosonek nitto ganeyaassi oor oor kesa foobaas giddiwa.

²⁰ Isarik kuphifeti kabaasik maafetiis Daamiisa meeta'utawa.

²¹ Maafeti kabaasik isaas oomiisin oodnoy bar bar meefe; es barik isaas maktefeen oomiis zayefe.

²² Shakafooti diira muuti keenewa ushati keene turkitiyoso? Wedey Ha'oosi betekiristaninon

kashshitiyoso? Wedey isa wuzbesi foonto tukamni meyanon ichshutikoso? Ese awu nittok unarinso? Es bari boor'a han chowaasik nittotin galattonaroso? Isanne aafawa galattona wuza.

²³ Daamiiskin ephna baron nittok aatira imingwa. Daam Yesus aatere imtena waalaasik kixxaason kabgire;

²⁴ Galatni shiipho shiiphenanneen orfo batte: «Han bar nittok sinni atunaaswa; es baron taan yaadatonir zagutiwa» yi.

²⁵ Esiisimato dey meeta'usneen orfo toofooson kabgire: «Han toofoos harinnaasik sinni gaddo teyyawa; han toofoossin ushfeti kabaasik es baron taan yaadatonir zagutiwa» yi.

²⁶ Han kixxaason maafeti kabaasiknawa han toofoossin ushfeti kabaasikna wonna wonna Daamiis yoonanneen kitubaason makoti.

²⁷ Ese oonu muunak sholsunoyfeen Daamiisa kixxanon meefaananenawa Daamiisa toofosin ushfaananena; Daamiisa ashnewa harinne asin hatessina boor'a mamusterwa.

²⁸ Es bari boor'a aaffe asunu han kixxaason muubaastannawa toofoossin ushbaastanna zeemme teetbaason tu'nuwowa.

²⁹ Aaffe asunu Daamiisa atu awu sinnamato mai'sire arunoy Daamiisa meeta'unon meefaananenawa Daamiisa toofoossin ushfaananena basa teetaasta mangsuni kar'atu ephphe yoona.

³⁰ Nitto ganeyaassin showoni meya hopisete-sewa mettesetese dey isa isa meya kitiseteesnu es bari boor'awa.

³¹ Inno teetaasta mangsu kar'ni sinafaanane mangsuni kar'aasi sikalosi gandoni kabatawa.

³² Sinuntano hanneen han daasneen ane mangsu innoosta katonoynamato hash Daamiis

mangsu kar'e innotin ke'ifewa.

³³ Es bari boor'a aytaasakitono! Daamiisa meeta'uni muuk zuuttefeti kabaasik nittotna nittotna wal oodtiwa.

³⁴ Zuuttefeti zuuttoos mangsu nittoosta katonak zagunir sinnoynaron nitto ganeyaassin makter feefaanane keebaassik muwo. Fu'te wuzaasik nittoki yaana wono ooma sitiri nittok imanawa.

12

Korto Ayyanaasi Imanikito

¹ Aytaasakitono! Hash dey Korto Ayyanani imaason arutimato sholefawungwa.

² Amantonti foonto sinna faati kabaasik arunoyti wuzaasik zoonustera wolla chimnoy koo'looski hamet faatir sinamato arifeti.

³ Es bar boor'a Ha'oni Ayyanak zoonustefet Yesusnin erwunir oonu aafewa. Esiisimato Korto Ayyanak sina shakaanane oonu «Yesus Daamma» yifer aafe sinamato ta nittok makefawungwa.

⁴ Oom ooma Korto Ayyanani ima faarwa. Sinuntano Korto Ayyanaas isarwa.

⁵ Oom ooma Ha'oni wosto faarwa; sinuntano Daamiis isarwa.

⁶ Wostobaas oom oomawa; sinuntano zuuttambaase asin zuutira zagifaas isa Ha'ooswa.

⁷ Isarba isarbaasik Korto Ayyanaason ammanon kotte makoni ima imfanaas zuuttamniise asik ke'anawa.

⁸ Korto Ayyanaas isaasik techmak makoni chima imar; oomiisik dey es Ayyanaas aruk wolloni chima imar.

⁹ Es isa Ayyanaas isaasik amanto imar; oomiisik dey fatuni ima imar.

¹⁰ Esiisimato isaasik biistera artonoy wuza zagu ni hugna imar; oomiisik dey raajini kaamaason makoni chima imar; oomiisik dey es imaasikito Korto Ayyanaaskin wedey kiina ayyanaaskin sinbaason korire aruni chima imar; esiisimato dey isaasik ooma ooma noonok wolloni chima imar; oomiisik dey ooma ooma noonok wolumte baron kotte makoni chima imfa.

Isa Asusa Atuta Ooma Ooma Billiti Faar

¹¹ [Sinuntano es baron zuutira zagifaas es isa Korto Ayyanaaswa. Korto Ayyanaas sholenamato asu isa isarbaasik ooma ooma ima imfa]

¹² Isa asus showo atuni billitiba faar. Atuusi billiti showo sinna faanaas es isa atustawa. Esiisimato Kiristoos showo atuni billitiba faana isa atunimatowa.

¹³ Ayhud sinfenik; Girikni asu sinfenik; boz sinfenik; birmadumma kesa asu sinfenik inno zuuttamniise isa atu sinanik Korto Ayyanaasik haphuqteniwa. Zuuttamniise dey es isa Ayyanaaskin ushniwa.

¹⁴ Isa atu wosustenaas showo atuni billitiiskintano isa atu bar barkin koi'batawa.

¹⁵ Wochoos: «Ta kushu sina shakina boor'a atuni billititawa» iyaanane eekan; ekka ubaasik atuusi billiti sinbaas feeshniroso?

¹⁶ Odoos dey: «Ta aafa sina shakina boor'a atuni billiti aafa sinanawuza» iyaanane; eekan ekka ubaasik atuni billiti sinbaas feeshniroso?

¹⁷ Isa atuus zuuttera aafa aafa sini sinfaanane awuk odtona kabanso? Isa atu zuuttambaase odo odo sini sinfaanane awuk sawustera biistona kabanso?

¹⁸ Sinuntano hash Ha'oos bar sholenamato isa atuus billitiis atuusik sholsi dimbaasta ephpha duunak zagiwa.

¹⁹ Zuuttambaase isa billiti sini sinfaanane tuuma atu ayin bestona kabanso!

²⁰ Sinuntano hash showo billiti faafanaknu atuus isarwa.

²¹ Aafaas kushuson: «Ne taak aane sholsifewe!» unak aafa chimanawuza. Teetaas dey wochooson: «Ne taak aane sholsifewe!» unak aafa chimanawuza;

²² Es baristannu akamanon hopiyane faar sinna bestefa atuusi billitisikito oomaastan denalonon sholsuwa.

²³ Garo ulfinba faarne faar sinna bestefa atuusi billitisikitok arkiron ulfina immirwa. Biyak iichune faar sinna bestefa atuusi billitisikitok arkiron ulfina imma oodfeniwa.

²⁴ Sinuntano biyak iichonoyni atuusi billitisikitok es bar zuuttambaase aane sholsifa. Sinfanaknu Ha'oos biyak iichune faar sinna bestefa atuniisi billitinon arkiron ulfinak oodtonamato zagira atuusi billitisi ke'iwa.

²⁵ Es baron dey zaginaas atuusi billitini ganeyaassi oor oor kesa foonoyaron bare bare wal safaronakwa.

²⁶ Isa atuusi billiti rakkatefeen ooma atuusi billitisikito zuuttambaase dey anetu rakkatefawa. Isa atuusi billiti ulfintefana kabaasik ooma atuusi billitinikito dey ane girefa.

²⁷ Nitto dey Kiristoosni atuni billitiwa; Isa isarnitiis basa atuusi billitiwa.

²⁸ Es bari boor'a Ha'oos asu isa isarbaasin betekiristaniissi ooma ooma wostoba foonamato zagiwa. Es barik zeemma wosini meyanon; hepsaastak raajjuni meyanon; keezsastak

assinynyani meyanon taatsiwa. Tusira dey biistera artonoy wuza zaguni baassotin; tusira dey fatuni ima baassok imtena baassotin; asunin argasuni ima baassok imtena baassotin; ha'suni meyanonnawa ooma ooma noonok wolumsoni asuni meyanon hoossiwa.

²⁹ Zuuttambesiise wosinosa? Zuuttambesiise raajjunosa? Zuuttambesiise assinynyansosa? Zuuttambaase biistera artonoy wuza zagseteroso?

³⁰ Zuuttambesiise asik fatuni ima baassok faaroso? Zuuttambesiise ooma ooma noonok maksone arubesi faaroso?

³¹ Es bari boor'a zuuttambaase asiistan denalo sina imaasikitonon danatik chimma sholotiwa. Hash dey zuuttambaase asiistan denalo sina ugnaason nittok besunawa.

Hash dey zuuttambaase asiistan denalo sina imaason besunawa.

13

Futoni Keeshtana

¹ Asuni meeni noonoknawa Ha'oosi wosini noonokna wollefanyaknu keeshtanna tishifaanane shorukten sikil sikilit giilfa bitta wedey ashshiqe siningwa.

² Raaji makoni ima taak imtefananenawa aacho wuzason zuutira arifaanane dey aru zuutera taak faafaanane aamaason isa dimtan ooma dimta waar'a taamni amantona faafaan keesh-tana tayissi tishifaananena shima siningwa.

³ Taak fa wuzason zuutira tukamni meyak haa'faanane; ashnaasnu fui'tonoynaron geyak ki-ichchonak aatira imaat keeshtana tayissi tishifaanane aafa taak ke'anawuza.

⁴ Keeshtanaas fakir; keeshtanaas ma'aron zagir; keeshtanaas koononik aane zagifa; keeshtanba faana asu basa teetaasik aane teetefe; keeshtanba faana asu aane beegantefe.

⁵ Keeshtanaas sitiriba foonto aane zagifa; keeshtanba faana asu barik ke'ni bar baron aane sholefe; keeshtanba faana asu aane haarefe; keeshtanba faana asu miir'amefenaknu miir'ambaason aane faadife.

⁶ Keeshtanba faana asu futo sina wuzaastatu girefeteno futo sinnoy wuzaasta aane girefe.

⁷ Keeshtanba faana asu zuuttambaase asin chimar; zuuttambaase asiista amaner; zuuttambaase asiista abdi zagir; zuuttambaase asiista zagire yerer.

⁸ Keeshtamba faana asu aagene aagene aane gandefe; raaji makoni imaas aatar; ooma ooma noonok wolloni chimaas aatar; arusnu sinfaanane aatar.

⁹ Arifeni bar sinun raaji makefeni bar baggawa.

¹⁰ Sinuntano futo isa eshba foonto wuzaas yaafana kabaasik bagto sina bar feeshanawa.

¹¹ Daaga nawa sinna faana kabaasik daaga naanimato wollet faanar; dey daaga naanimato safaret faanar, daaga naanimato tun'nit faanar, Sinuntano gayma asu sinfana kabaasik daaga naani amalanaason beyingwa.

¹² Hash inkaliisik biifenisimato xaqaxaqaasitu biidifeni. Sinuntano es kabaasik ammanon biyani. Hash arifanaas baggawa; sinuntano es kabaasik Ha'oos taan arifanaasne faaron tuma aruna foonawa.

¹³ Ese amanto, abdi, keeshtanaas keezobaase zagira foona; sinuntano han barikitoni

ganeyaassin arkiis keeshtanawa.

14

Ooma Ooma Noonok Wolloni Imaasikito

¹ Ese keeshtanaasik zoonustotiwa; Korto Ayyanaasi imanon arkiron raajini makoosi imanon mai'sira sholoti.

² Ooma ooma noonok wolfe bar Ha'oosiktano asunik aane makefe. Aacho sina chowaason Korto Ayyanaasi hugnak maktefana boor'a es makte kaamaason arifer aafe.

³ Sinuntano raajiison makefe bar oomiisin yee-tuk, zagguknawa chinukna asuni meyak makefe.

⁴ Ooma ooma noonok wolfe asus basa teetaasontu zagife; sinuntano raaji makefe bar kiristanani meeni maabarasontu zagife.

⁵ Zuuttamnitiise ooma ooma noonok wolfeaatine shunana kabawa. Sinuntano es baristan mai'sira shunanaas raajiison makefaatinewa. Kiristanani meeni maabaraas zagunak ooma ooma noonok wolfe asusa wollanon kotte makoni asu tishifaanane raaji makefe bar denalowa.

⁶ Ese ayni meyane! Nittoki yaafana kabaasik ooma ooma noonok maket yaafanane awu nitok ke'nirinso? Es baristan nittok ke'niis Ha'oosi aacho chowanon ammanon kisire makooson, aruuson, raajini makooson, assuuson ephpha yaafananewa.

⁷ Ulullenimatona kaamanimatona faase kaaba foonto suruni kodaasikitonu ooma ooma giilni kaama imanak duusto shakaanane imfana teechni kaama awu sinnamato aakkak artonirinso?

⁸ Tuturuus artonoy kaamak fugtefaanane neebok oonso hooroniri?

⁹ Esiisimato noonok wollefeti kabaasik amma sina kaamak mako shakaatine wollefeti baron oo aruk chimnirinso? Siruusik makedifetirne faartu sinatiwa.

¹⁰ Ese han daastak showo tesa noono faar; kotba foonto noono dey aafawa.

¹¹ Ese ta wollumtefa noonosi kotanon arunoy-nar sinfaanane wollefe asusik irbatu sinanawa; bar dey taak irbatu sinana.

¹² Nitto dey Korto Ayyanaasi imanikitonon akamanon sholet faatir sinna boor'a arkiron sholotik sholsinaas betkiristaniison zaggifa imaasikito showonakwa.

¹³ Es bari boor'a ooma ooma noonok wollefe asu kotte makoni chimba foonak shiiphphowa.

¹⁴ Ta ooma ooma noonok shiiphefaanane Ayyanaastu shiiphefartano kanunaas gaanba foontowa.

¹⁵ Ekka awu zagunak sholsifaso? Ayyanaasik shiiphona; kanunaasik dey shiiphona; dey Ayyanaasik gaama gaamanawa; kanunaasik dey gaama gaamnawa.

¹⁶ Ekka sina shakaanane ne Ayyanak Ha'ooson galattefata kabaasik ne makefata baron arunoy irba asu galatni shiiphoneesik: «Aamin» uuk aakkak chimnirinso?

¹⁷ Futoosik ne shiipheta galatni shiiphoos ma'arikwa. Sinuntano oom asusin aafa zaguna wuza

¹⁸ Ta nitto zuuttamniitiise asiistan denalo ooma ooma noonok wollefana boor'a Ha'ooson galattefawungwa.

¹⁹ Sinuntano ooma ooma noonok showo kaamak faadtoni kaama makonaasneen oomni meyanon assukwa iyaat betekiristaniisik uuch kaama arto noonok kanunaasik makonaktu sholefawungwa.

²⁰ Aytaasakitono! Mangu wuzaasik daaga naanggota sintitano safarantiisik daaga naanggotnimato sinatiitawa. Es baron shakaat safarantiisik aru sinati.

²¹ Esiis dey:

«Ooma ooma noonok wollege asuni meenawa;
alaga asuni meeni noonokna;
han daraasik makefawungwa;
es barnu sinfanak aafa taan odosone wuza»
yifawa Daama Ha'oos»

yistera tumaassi tichchewa.

²² Es bari boor'a ooma ooma noonok wol-
laas mallato sinnaas amanonoy asuni meyaktano
amanesefe asuni meyaktawa. Sinuntano raajini
kaama makoos mallato sinnaas amanesefe asuni
meyaktano amanonoy asuni meyaktawa.

²³ Ese betekiristanini amanyinyini meya
zuuttesefe kabaasik isarbesi isarbesiis ooma
ooma noonok wollesefaatenenawa arunor
wedey amanonoy asuni meya yeeseefaatenena
es maksefe baassotin: «Han asuni meya
nifasesetewa» aafanoso usone wuza?

²⁴ Sinuntano zuuttere raajini kaama
makefaananenawa amanonor wedey arunor
asu yeefananena odena kaama zuuttambaasik
waqasterwa. Esiisimato dey odena kaama
zuuttambaase asik mangsu basaasta kater.

²⁵ Nibbaassi aachera fa wuzaas ammanon kessa
besterwa; sinbaasik gandere: «Futoosik Ha'oos

baasso ganeyaassiwa!» yit Ha'oosik sagadonawa.

Maabarak Shiiphoni Kabaasik Foonak Sholsi Sitiri

²⁶ Ayni meyan! Ese awu zagunik sholsifaso? Shiiphok zuuttesefeti kabaasik nittoossin isaasik gaama faar; isaasik assu faar; isaasik aacho sina wuzason ammanon kisu faar; isaasik ooma ooma noonok mako faar; isaasik makte baron kotte mako faar. Es imaas zuuttera kiristanani meyanon zaggunir sinanak sholsuwa.

²⁷ Ooma ooma noonok makoni asuni meya feesefaatene hep wedey arkifanane keez sinne tara tara maksoto,. Baasso maksete baron oom asu kotte makowo.

²⁸ Sinuntano kotte makoni asu tishifaanane ooma ooma noonok makesefe baasso zuuttoni dimaastak shaakkusoto. Baasso teetasiknawa Ha'oosikna koi'ba maksoto.

²⁹ Raajjuni meya hep wedey keez sinere maksoto; oomiis dey makte baron odesere mai'sire maazzansoto.

³⁰ Zuuttoosta diise oom asu isa wuza bestefaanane tesuni maket fe bar shaakkuwo.

³¹ Isa isarbaas arunaknawa zagunakna zuut-tamnitiise tara tara Ha'oosi wosiyanon mako chimatiwa.

³² Raajjuni meeni raajini Ayyanaas raajjuni meyak ajajamer.

³³ Ha'oni dara sina betekiristaniisikito zuut-tambaase asiissi zagtefanaysimato Ha'oos nagani Ha'oostano sasni Ha'otawa.

³⁴ Mashka meya Ha'o shiiphoni zuuttoni kabak shaakkusoto. Tumaas baassotin ajajefanaaysimato ajajamosonektano maksonek aane makowawa.

³⁵ Isa isa wuza aruk sholsefaatene keebesiissik teegobesiisin mamussoto; shiiphoni zuuttostak mashkasu wollefaanane iichuwa.

³⁶ Shakafooti Ha'oosi kaama nittokinnoso? Wedey Ha'oosi kaama yaara kar'naas nitto nittoknoso?

³⁷ Ta raajjuwa wedey Ayyanani ima tayissi faarwa yife asu feefaanane han tichinaas Daami-isa ajaji sinbaason aruwowa.

³⁸ Es baron arunor feefaanane bar dey aane artefewa.

³⁹ Es bari boor'a ayni meyane! Raajini makoo-son mai'sira sholotiwa; ooma ooma noonok wol-laason dey kalatiita.

⁴⁰ Sinuntano zuuttambaase sholsinamatonawa sitirikna sinun.

15

Kiristoosni Kitun Kabu

¹ Hash dey ayni meyane! Assina misirachchuni kaamaason yadasunak sholefawungwa, Es misirachchuni kaamaas dey nitto ephpha taaseti barewa zagira yeerseti barewa.

² Ta nittotin assina misirachchuni kaamaason mai'sira ephaatine bariktu farutiwa, Ekka sina shakaanane amantontiis shimaasikwa.

³ Ta ephphataana tesuni gefaasta fa baron nittok aatingwa, Ta nittok aatina wuzaas ko-rto matsafaasi tichchenaasimato Kiristoos inno boor'aasik kiti;

⁴ Kabbarte; Korto matsafaasi tichchenaasimato keezsinari wono kitun kabi yifarwa.

⁵ Bar phexiros beste, orfo dey asire hep wosini meyak beste.

⁶ Uuch tiyaastan denalo sina basa zoonsiisik is-arga beste; baassossin showobesiis hash hawung kar'e kaak feeseter. Sinuntano isa isaas kitisete.

⁷ Esseen orfo Yaqobnik beste, wosini meya zuut-tambesiise asik beste.

⁸ Koi'astak nasune feer sina taak dey beste.

⁹ Ta Ha'oosi betekiristaninon betira tishkit faa-nar sinna boor'a wosini meya zuuttambesiise asi-issin hater dey wosi yistera teegtonak sholsunoy-narwa.

¹⁰ Sinuntano ta hash sinna baron sinnaas Ha'oosi otmakwa. Taak imte otmaas gaanba foontonon aane fui'towa. Esiistan aatta oomiisatan arkiron wostok hopin. Sinuntano es baron zagiis taneen ane fa Ha'oosi otmatano tatewa.

¹¹ Ese ta sinfanak wedey baasso sinefek as-sifeniis es barongwa; nitto dey amanetiis es barongwa.

Kituni Meeni Kitun Kabu

¹² Sinuntano Kiristoos kitun kabinamato mak-eni sinfaanane nittoossin isa isa meya kitun kabu aafawa aakkak yisefeso?

¹³ Kitun kabu tishifaanane Kiristoos kitun aane kabuwe uwa.

¹⁴ Kiristoos kitun kabu shakaanane inno assus sinun nitto amantoos shimaasik sinbawa.

¹⁵ Dey Ha'oos Kiristoosnin kitun kabgiwa yire assuniisik eshinynya Ha'oni zaal sini uwa. Ese kiti asuni meya kitun kabu shaksefaatene Ha'oos Kiristoosnin dey kitun aane kabguwa uwa.

¹⁶ Kiti asuni meya kitun kabu shaksefaatene Kiristoos kitun aane kabuwewa uwa.

¹⁷ Kiristoos kitun aane kabuwe sinfananane amantontiis shimaasikwa. Hashnu boor'aassitu faaseti uwa.

¹⁸ Kiristoosnik amanere kiti baasso tishisete uwa:

¹⁹ Kiristoosnik abdi zagifeniis han daastaki kaak koi'ba sinfaanane asu zuuttambaase asiissin arkiron innok suumoni asu sinanirwa.

²⁰ Sinuntano Kiristoos kiti baassok kitun kabuni uuzza sinne futok kitun kabiwa.

²¹ Kitu yaanaas isa asuniki kamo sinnamato kitun kabuus dey isa asuniki kamo siniwa.

²² Addamni boor'a asu zuuttambaase kitifenamato dey Kiristoosni boor'a asu zuuttambaase kaa danana.

²³ Sinuntano es bar dey sinanaas isarba isarbaas tarabaasikwa. Kiristoos kitun kabubaasik uuzzawa. Hanneen dey Kiristoos yeefena kabaasik basar sina baasso dey kitun kabsone.

²⁴ Tusire dey bar ha'susonnawa ha'suni hugnaasonna dey giidoson zuutire tishkaat taatoo-son Aba Ha'oosik imfena kabaasik han daasi ko'a sinana.

²⁵ Ha'oos gumabaasin zuutira ha'subaasi sikalosi zaguna kabaneen Kiristoos taattonak sholsuwa.

²⁶ Mertera koi'baastak tishuniis guma sina kitu-uswa.

²⁷ «Ha'oos zuuttambaase asin ha'subaasi sikalosi zagiwa» yifar tichchewa. Sinuntano: «Zuuttambaase ha'subaasi sikalosi zagi» uus zuuttambaase asin ha'subaasi sikalosi zagi Aba Ha'ooson aane daysifa.

²⁸ Wuza zuuttambaase Kiristoosni ha'suni sikalosi sinnanneen orfo Aba Ha'o zuutira

zuuttambaase asiista sinanak Naas teetbaasik zuuttambaase asin ha'subaasi sikalosi zagi Aba Ha'oosi ha'suni sikalosi sinanawa.

²⁹ Ese kiti asuni meya kitun kabso shaksoner sinfaatane kiti asuni meeni chowaasik haphuqtesefe baasso zuuttere buu'besiis aambanso? Kiti asuni meya isanne aafa kitun kabso wuza sinfaanane asuni meya baasso edde awuniron haphuqtesefeso?

³⁰ Innonu sinfenik sa'ati sa'atiissik adagata katuni wuzak aattera oodtet faaniis awuni boor'anso?

³¹ Ayni meyane! Taak wonna wonna kitu upherwa; han baron nittok makefanaas Daamni Yesus Kiristoosniki kamo nittoosta fa teetonaas futo sinna boor'awa.

³² Asuni safarasimato ta Efesonuk gonyoosneen ane kabonaas taak ke'naas aambanso? Kituni meya kitun kabu shaksoner sinefaatene: «Wono kitunir sinna boor'a hani yaani muuni; ushni» yistenaaysimato sinnirwa.

³³ Eshtotiitawa; «Mangu zoomoos ma'a amalaa-son mangsirwa»

³⁴ Hang nibnitiiski woluti; boor'aason dey wostotiita; nitto ganeyaassi isa isa meya Ha'ooson arunor feeseter. Han baron ekka yifanaas nitto iichchotikwa.

Kitun Kabi Atu

³⁵ Sinuntano isa asu: «Kiti asuni meya kabsoonees aakkakinso? Kitun kabsefe kabaasik fooni atubesiis awune faarinso?» yire mamsuna sinana:

³⁶ Ne gowwa! Bukta meyaas kitu shakaanane kaaba aafa foonu wuza.

³⁷ Ne bukfata kabaasik akakiltiison aane tokewa; sinuntano zalaas awuzakne zago wedey ooma wuza sinanak chimana.

³⁸ Sinuntano Ha'oos sholenamato zalaasik atuba imfawa. Zala isa isarbaasik ooma ooma atu imfawa.

³⁹ Asha zuuttera isa tesatawa; asuni ashaas isa tesa; kaabare yere waagaasi asha dey ooma tesawa; kasasikitori ashadey ooma tesa; kurxummiisi ashadey ooma tesawa.

⁴⁰ Esiisimato dey samaki atu faar; han daastaki atu dey faarwa. Sinuntano samaki atuusi ulfina isa tesawa; han daastaki atuusi ulfina dey ooma tesa.

⁴¹ Awaasi ulfina isa tesa; assaasi ulfina dey ooma tesa; baakuraasi ulfina dey ooma tesa; isa baakuraas ooma baakuraastan ooma ulfinba faar.

⁴² Kitun kabuni asuni meeni chowaas han barne faar. Kuupni atutu bukterfar; kuuppa tishunor hayewa atutu sinna kabuna.

⁴³ Salphinak bukte bar ulfinak kabuna; hopiya sinna bukte bar hugnabare yerer sinna kabuna.

⁴⁴ Ashni atu sinna bukte bar Ayyanani atu sinna kabuna. Ashni atu faananneen Ayyanani atu dey faar.

⁴⁵ Es bari boor'a: «Tesuni asu Addam hayew testo sini» yistera tichchewa. Sinuntano ko'ni Addam sinna Kiristoos dey kaa imni Ayyana sini.

⁴⁶ Sinuntano tesusta yeyiis asha mayoteno Ayyananirtewa. Ayyananiis yeenaas asha mayosneen orfowa.

⁴⁷ Tesuni asus testenaas han daaskin sinna boor'a han daastakirwa; hepsani asu yeenaas samangwa.

⁴⁸ Han daastakir sina baasso han daastan teste basasimatowa. Saman sina baasso saman ye basasimatowa.

⁴⁹ Han daastaki asusa gitone feer sinnimato dey samaki asusa gitone feer sinanirwa.

⁵⁰ Ayni meyanee! Ta nittok makefanaas haniiswa; ashaasewa hannaase Ha'oosi taatonon aafa ephphatoona wuza. Esiisimato dey kituni atuus kitunoy hayewa atuuson aafa ephphatoona wuza.

⁵¹ Ese isa aacho wuza nittok makonawa; inno zuuttamniise aafawa kitun wuza; sinuntano zuuttamniise sooltoni.

⁵² Sooltoniis dey koi'ni tuturuus fugtefana kabaasik aafni walgaat yipgifeesne faaron isargakwa. Tuturuus fugtona; kiti asuni meya dey kitunor hayew sinne kitun kabzone; inno dey sooltoni.

⁵³ Han kuupni bar kuupnoyson han kituni bar kitunoyson mayanak sholsuwa.

⁵⁴ Es kuupni bar kuupnoyson han kituni bar kitunoyson mayfana kabaasik: «Kituus tishi dey merte!» yistera tichche bar ko'unawa.

⁵⁵ Esiisimato dey:

«Kituse! Merere kabunees ayfase?

Kituse! Asuni miir'efata
hugnanees ayfase?» yistewa.

⁵⁶ Kituusi kejni hugnaas boor'aaswa; boor'aasi hugna dey tumaaswa.

⁵⁷ Sinuntano Daamni Yesu Kiristoosniki kamo meronik zagifa Ha'oosik galata sinfawungwa.

⁵⁸ Es bari boor'a shunto aytaasakitono! Zagira yerotiwa; isa wuzaknu sinfaanane shorkotiita;

Daamiisa wostok hopifeti bar shimaasik sina bey-baason arira yeetunoy wonna wonna Daamiisa wostonon wostok chimti.

16

Yerusalemki Amanynyini Meyak Zuutte Waagni Argasu

¹ Amanynyinik zagtefa waagni kisuni chowaasik Galatiyani betekiristaniisikitok ajajenaasimato nitto dey ekka zaguti.

² Ta yaafana kabaasik waagni kisu zagtonoy-namato gudda guddaasik wono nitto ganeyaassin isa isarbaasik danfena waagastan kisire oor kun-suwo.

³ Ta nittoki yaafana kabaasik nitto korira imeti asuni meya kisiseti waagaason ephphe Yerusalem hamonek geggesuni tichaneen ane wosuna.

⁴ Sholsifaanane ta dey hamana; baasso taneen ane hamak chimone.

Phawulosni Kopposikito

⁵ Maqedoniya kamo hamak koppa'ena boor'a esta kamo aatfana kabaasik nittoki yoona.

⁶ Hamana dima aafarissinu ugunaasik sinni argasu taak zagutik awuzakne nittoki esta foona sinana; awuzakne dey yeeshuuson nittoneen ane aatuna sinana.

⁷ Hash esta kamo aatfana kabaasik nittotin biyanak aane sholot; Daamiisa fiqadi sinfaanane garonon dica wona nittoneen ane foonamato abdi zagifawungwa.

⁸ Sinuntano penxekosteni heebo kar'ananeen Efesonuktu foona.

⁹ Showo wostoni ugna taak gachche; sinuntano tugga'efe meya showowa.

¹⁰ Ximotiyos nittoki yeefena kabaasik digaba foontonon nittoneen ane foonak argasuti. Bar dey tayisimato Daamiisa wostonontu wostefe.

¹¹ Es bari boor'a oonu barin kashshunoynamato bar ayni meyaneeen ane taaki wolle yoonak oodet faanar sinna boor'a taaki nagak wolle yoonak ugunbaasik sholsi baron argasuti.

¹² Ayni sina Aphphilos oom ayni meyaneeen ane nittotin yeesere biyosonek mai'sira shiiphera faanar. Sinuntano bar hash nittoki yook aane sholowe; barik mai'na wono yoona.

Koi'ni Kiitonewa Nagani Ooshshone

¹³ Guzuti; amantok zagira yeroti; chimti; zaguti.

¹⁴ Zagifeti baron zuutira keeshtanak zaguti.

¹⁵ Ayni meyanee! Isxifanosni keerki meya Akayani daastak tesuni amanyinyini meya sinetematonawa amanyinyini meyanon wostok teetbesiison aatire imetematona arifeti.

¹⁶ Es effetena asuni meyaknawa baassoneen ane wostok hopit feesefe baasso zuuttambesiise asikna ajajamosotik mai'sira yaadatsifawungwa.

¹⁷ Isxifanosniknawa Ferdonaxisna dey Akayqosna baasso taaki yoos taan girsi. Nitto taneen ane upho shakuntiisik baasso nitto edde taak yo'i baron tuunisete.

¹⁸ Baassonawa nittona asi ayyanaasik beysa imete. Es bari boor'a es baassone fe asuni meya ulfintosonek sholsifawa.

¹⁹ Iisiyak fa betekiristaniisikito naga nittok ooshshesete. Aqelanewa Pirişqilane; dey keebesiişi zuutteseſe kiristanani meya dey zuuttere nibbesiişsin kabi naga nittok Daamiisa sunak ooshshesete.

²⁰ Hantak feese kiristanani meya zuuttere nittok naga ooshshesete; korto daamok naga wol ooshshosoti.

²¹ Ta Phawulos han nagani tichaason kushunaasik tichingwa.

²² Daamiisin şhunnor feefaanane erwutter sinowa! Daamniiso! Yowa!

²³ Daam Yesusni otmaas nittoneen ane sinfawung.

²⁴ Keeshtannaas Kiristoos Yesusniki kamo zuuttamnitisneen ane sinfawung; Amin!

Gaddo Teyya

The New Testament in the Yemsa language of Ethiopia, Latin script

copyright © 2025 The Word for the World International

Language: (Yemsa)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-06

PDF generated using Haiola and XeLaTeX on 19 Dec 2025 from source files dated 6 May 2025

7608a66e-9602-5623-89f0-436ebf008df3